

Newyddlen y Rhaglen Moderneiddio Addysg - Rhagfyr 2010


Prosiect Ysgol Bryn Collen / Gwernant

Mae'r gwaith o fuddsoddi £700,000 i ddatblygu Ysgol Bryn Collen ac Ysgol y Gwernant, sy'n rhannu'r un safle yn Llangollen, newydd ddechrau. Bydd yn cynnwys estyniadau a gwaith uwchraddio, a'r ysgolion hyn fydd y rhai cyntaf yn Sir Ddinbych i'w gwresogi trwy gyfrwng pwmp sy'n defnyddio gwres o'r ddaear.

Bydd yr arian yn ymdrin â nifer o faterion sydd wedi codi yn sgîl y ddwy ysgol yn rhannu'r un safle. Bydd mynedfa newydd, cyntedd, derbynfa, swyddfa'r pennaeth ac ystafell athrawon a dwy ystafell ddosbarth newydd yn cael eu creu ar gyfer Ysgol y Gwernant. Bydd ystafell ddosbarth yn Ysgol Bryn Collen yn cael ei hailwampio, ynghyd â gwelliannau i'r brif fynedfa ac estyniad i'r ystafell athrawon. Bydd y dosbarth meithrin a derbyn yn yr adeilad presennol yn cael eu huwchraddio a bydd toiledau newydd hefyd.

Bydd y gwaith hwn yn caniatáu cael gwared o dri chaban o'r safle ac yn galluogi'r clwb tu allan i oriau ysgol, sy'n defnyddio caban ar hyn o bryd, gael ystafell barhaol yn yr adeilad.

Dechreuodd y gwaith ar 22 Tachwedd 2010 a disgwyllir ei orffen ym mis Awst 2011.



Llun artist o Ysgol Bryn Collen ac Ysgol y Gwernant ar eu newydd wedd

Adolygiad Ardal Edeyrnion – Ymgynghori Dechreuol


Dechreuodd yr awdurdod y broses o ymgynghori dechreuol ynghylch rhesymoli nifer yr ysgolion cynradd yn ardal Edeyrnion ar 8 Tachwedd 2010. Mae saith ysgol yn yr ardal ac mae nifer o faterion y mae'n rhaid mynd i'r afael â nhw, yn cynnwys nifer sylweddol o leoedd dros ben. Daw'r ymgynghoriad dechreuol i ben ar 18 Chwefror 2011 ac mae'n cynnwys cyfarfodydd ymgynghori â'r staff, y rhieni a'r gymuned a chynnal nifer o weithdai.



Astudiaethau Dichonoldeb – Ysgol Uwchradd y Rhyl ac Ysgol Glan Clwyd

Derbyniodd y Cyngor gyllid gan Lywodraeth y Cynulliad i gynnal astudiaeth ddichonoldeb ar ehangu ac ailwampio Ysgol Glan Clwyd ac adeiladu adeilad newydd ar gyfer Ysgol Uwchradd y Rhyl. Mae'r astudiaethau dichonoldeb wedi'u cwblhau yn awr, ond mae camau nesaf y ddau ddatblygiad yn ddibynnol ar dderbyn cyllid gan Lywodraeth y Cynulliad.

Mae'r ddau brosiect ym Mand A cais Rhaglen Amlinellol Strategol Sir Ddinbych ar gyfer rhaglen Ysgolion yr Unfed Ganrif ar Hugain. Cyflwynir y ddogfen ar 10 Rhagfyr 2010.



Braslun o sut allai Ysgol Glan Clwyd edrych yn dilyn estyniad i ac ailwampio'r ysgol

Adolygiad Ardal Prestatyn

Cwblhawyd yr adolygiad o ddarpariaeth cynradd yn ardal Prestatyn yn ddiweddar, a chyhoeddwyd dau hysbysiad statudol ynghylch dau gynnis ar 10 Tachwedd 2010.

- Cyfuno Ysgol Fabanod ac Ysgol Iau Bodnant gan ddefnyddio safleoedd presennol y ddwy ysgol
- Estyniad i Ysgol y Lllys

Cyllid Cyfran 3

Llwyddodd Cyngor Sir Ddinbych i sicrhau £3m o gyllid gan Lywodraeth y Cynulliad a fydd yn ein galluogi i fuddsoddi £4.2m yn yr ysgolion cynradd cyfrwng Cymraeg yng ngogledd y sir. Defnyddir y cyllid hwn i roi estyniad ar Ysgol y Lllys, Prestatyn, yn amodol ar ymgynghori a chymeradwyaeth statudol. Bydd y cyllid hefyd yn galluogi'r Cyngor i fwrw ymlaen â gwaith ailfodelu yn Ysgol Twm o'r Nant, Dinbych ac Ysgol Dewi Sant, Y Rhyl.

Ysgol Dyffryn Ial

Mae trafodaethau'n cael eu cynnal â'r Corff Llywodraethol a fyddai'n gweld yr ysgol yn symud o ddwy safle ar wahân yn Llandegla a Bryneglwys i un safle. Byddai'r prosiect yn cael ei gyllido o'r arbedion a fyddai'n deillio o gael un safle.

Ysgol Dinas Brân – Cyfleusterau ciniawa

Mae'r bwyty a'r prosiectau uwchraddio yn Ysgol Dinas Brân wedi'u cwblhau ac mae'r ardaloedd newydd yn cael eu defnyddio i'r eithaf gan yr ysgol.

Am fwy o wybodaeth ewch i:

www.sirddinbych.gov.uk/moderneiddioaddysg

